

Gair Duw

Darlleniad 1: Eseia 40

Darlleniad 2: Ioan 1

‘Dyma Feibil annwyl Iesu,
Dyma rodd deheulaw Duw;
Dengys hwn y ffordd i farw,
Dengys hwn y ffordd i fyw.
Dengys hwn y golled erchyll
Gafwyd draw yn Eden drist,
Dengys hwn y ffordd i’r bywyd
Trwy adnabod Iesu Grist.’

Diolch i Ti, Arglwydd, am dy Air, y Gair a greodd y bydysawd a phopeth sydd ynddo, a’r Gair sy’n cynnal pob un ohonom ar daith bywyd. Fe gredwn mai taith yw bywyd, a thaith ddigon helbulus ar brydiau, ond diolch am fedru canu ar y daith am dy Air i’n harwain.

‘Mae dy Air yn abl i’r harwain
Trwy’r anialwch mawr ymlaen.’

Gan mai ymlaen yr awn ar y daith, diolch i Ti am y Gair sy’n arwain nid yn unig ar daith bywyd ond ar daith tragwyddoldeb, ac mai ar dy Air y pwyswn hyd yn oed y pryd hynny. Fe gafodd cannoedd a miloedd o bobl gynhaliaeth a chynhysgaeth yn eu bywyd trwy rym dy Air Di. Cofiw’n wrth ddarllen hanes y proffwydi a’r apostolion gynt mai dy Air Di a’u cynhaliodd hyd yn oed mewn amgylchiadau digon helbulus ac argyfyngus. Ond llawenhawn mai yn dy Air Di’n unig y mae’r gallu i droi sefyllfaoedd helbulus yn gyfle i gyhoeddi dy anchwiliadwy olud. Mawr yw ein braint ninnau heddiw, Arglwydd, o fod yn gyhoeddwy a gwneuthurwy dy Air, bawb ohonom. Diolch hefyd nad ar gyfer rhyw ddsbarth arbennig o bobl y mae’r Gair yn addas ond ar gyfer pawb, ym mhob oes ac ym mhob sefyllfa.

Llefara wrthym ninnau heddiw, a phâr ein bod yn gwneud iawn a llawn ddefnydd o’th Air a geir yn y Beibl sy’n gyfoes i bawb ohonom. Arglwydd, fe ddiolchwn i Ti am bob argraffiad, am bob trosiad o’th Air mewn gwahanol ieithoedd heddiw i gyflwyno’r Gair ar ei newydd wedd er mwyn creu pobl newydd i Ti. Cawsom ninnau fel cenedl drysor yn y Beibl yn ein hiaith ein hunain. Cawsom drysor hefyd yn 1988 am Gyfieithiad Newydd o’r Beibl er mwyn gwneud dy Air yn ddealladwy i genedlaethau newydd o bobl fydd yn dod i edrych a synnu o’r newydd at dy fawrion weithredoedd.

Ond Arglwydd, pâr ein bod yn ymdeimlo â’r wefr mai cnawd yw gwir sylwedd dy Air, ac mai yng ngoleuni’r Un a wisgodd blisgyn cnawd, sef Iesu Grist, y mae dod i ddeall yr hyn y mae’r Gair yn ei gyflwyno i bob oes. Maddau i ni, Arglwydd, am fod mor ddeddfol, a hyd yn oed yn gaeth i draddodiadau, pan fo Iesu Grist yn cyflwyno rhyddid bywyd newydd i ni yng ngoleuni ac yng ngobaith dy Air. Sylweddolwn mai ein braint ni yw gwranddo ar Iesu, dy Fab a’n Harglwydd ninnau, ac mai llefaru dy ddymuniadau Di a wna Ef. Gwna ninnau’n rhai awyddus i wrando arno fel ein bod yn medru gweddio o waelod calon:

‘O! llefara addfwyn Iesu,
Mae dy eiriau fel y gwin,
Oll yn dwyn i mewn dangnefedd,
Ag sydd o anfeidrol rin.
Mae holl leisiau’r greadigaeth,
Holl ddeniadau cnawd a byd
Wrth dy lais hyfrytaf tawel
Yn distewi a mynd yn fud.’

Rho, Arglwydd, gynhaliaeth dy Air i bawb sy’n simsan a sigledig heddiw, a boed iddynt deimlo grym dy Eiriau. Rho i ninnau nerth yr Ysbryd i brofi ei ogoniant yn llawn trwy Iesu Grist.

Amen.

Iwan Ll. Jones